

Al larà indenant e anzit si spere di slargjâlu ancje a chês altris aziendis il progjet “Cressi cun plui lenghis”, inviât doi agns indaûr dal Dipartiment Materni infantîl di chê che e jere la Aziende sanitarie 5 in colaborazion cu la Agjenzie regionâl pe lenghe furlane. Dilunc de conference stampe che si è tignude lunis ai 8 di Fevrâr a Udin intal palaç de Region, il president de Arlef **Lorenzo Fabbro** al à confermât l'intindiment di consolidâ cheste iniziative lade fûr aromai de fase pilote e segnade di risultâts tant positîfs: “O sperin anzit - al à sotlineât Fabbro - che chest progjet cu la Aziende pe assistance sanitarie 2 ‘Bassa friulana-Isontina’, al puedi jessi slargjât in curt a chês altris aziendis de region”.

Il progjet inmaneat dal Dipartiment Materni infantîl di Palme e de Arlef par pandi il valôr dal plurilinguism al va indenant. Si spere che al puedi jessi slargjât.

» DI CHRISTIAN ROMANINI



Plui lenghis par cressi ben

PRINCIPI CONDIVIDÛT

Partint dal principi dividût a larc dai esperts che il bilinguism o fintremai il plurilinguism a sedin un strument bon di judâ il svilup inteletîf dal frut fin dai prins dîs di vite, il personâl sanitari al à scomençât a distribuî intai ponts nassite di Palme e Tisane valisutis che a contegnin gadgets e un piçul manuâl su lis oportunitâts ufiertis dal ûs di plui lenghis intune cui conseis dai esperts. “L’acet risiervât a cheste valisute, o ‘nt vin distribuîd plui di 1.200 - e à sclarît la referente infer-

mieristiche **Claudia Iogna Prat** - al è stât simpri tant positîf”. E stant che si fevelde di plurilinguism la ocasion e je tant util par valorizâ e doprâ ancje il furlan. “No dome l’ûs dal furlan al da plui serenitât ai nestrîs pazients, ma ancje cuant che a son i gnûfs furlans che a rivin dal forest - e à ricuardât **Silla Stel**, dal Dipartiment di Prevenzion de Aas 2 - il fat che si sedi di-

sponibii a doprâ plui lenghis ju fâs sintî plui ben agradîts e part de comunitât”. Ae conference stampe a jerin presints ancje **Silvana Fachin Schiavi**, che e à contribuît ae realizazion dal manuâl, **Stefano Facchin** primari di Ostetricie e gjinecologjie e **Roberto Perini** diretôr dal Dipartiment Materni infantîl de Aas 2.

✉ alessandro.digiusto@ifriuli.it

■ CINE PAR FURLAN

Il bant dal concors organizât dal Cec

Al è vignût fûr il bant de **AXI** edizion dal concors par tescj cinematografics in lenghe furlane che il Cec al organize ogni doi agns. Il concors al è dividût in 4 sezions: une dedicade aes senegjaturis cuntun prin premi di 1.500 euros; la seconde dedicade ai articui di critiche, ma dome dai films forescj presentâts ae edizion 2015 de Mostre dal Cine, cuntun prin premi di 400 euros; une sezion dedicade aes storiis par film cuntun prin premi di 250 euros e, par finî, une sezion dedicade ai saçs sul cine cuntun prin premi di 250 euros.

Par partecipâ al concors, i lavôrs a varan di jessi o inviâts par pueste o consegnâts a man, in dople copie, li dal Centro Espressioni Cinematografiche in vie Villalta, 24 a Udin, dentri dai 11 di Setembar dal 2016. Par info: cec@cecudine.org o tel. 0432 299545.

SCOLTADIS DI DRIU

Rivâ insom

O voi tal jet plui vulintîr cun tun biel libri pitôst che cun tune bie-
le femine. Cul libri, alman-
cul, o rivi fin insomp.



Pe Fieste dal Friûl 50mil euros pronts

Celebrazion a Gardiscje. Ai 27 di Març dai 2015, cu la leç 6, il Consei regionâl al istituzionâlizave la fieste dal Friûl. Di fat si lei tal articul 1 “Istituzion de ‘Fieste de Patrie dal Friûl’”: “Cul fin di ricuardâ e valorizâ lis origjins, la culture e la storie di autonomie dal popul furlan, cun cheste leç e je istituide la ‘Fieste de Patrie dal Friûl’ te zornade dai 3 di Avrîl, inovâl de istituzion dal Stât dal patriarcjât di Aquil-

lee”. La Region e à ancje delegât la Arlef ae gjestion dal event, che si davuelzarà a Gardiscje dal Lusiç propit domenie ai 3 di Avrîl.

Par spiegâ lis novitâts di cheste edizion, la Agjenzie e à convocât i ents publics e lis associazions interessâts miercus ai 20 di Zenâr. A son stadis anticipadis sedi la cuantitât di risorsis a disposizion sedi lis modalitâts di asse-



Chest an al tocje a Gardiscje

gnazion: sui 50 mil euros complessîfs, 10 mil a son za destinâts al Comun di Gardiscje pe celebrazion principâl, 7 mil a son chei che la Arlef e à metût a disposizion dal concors pe creazion dal video pe cjançon “No sta a contâmi dome chê storie” e chei altris 33 mil a saran assegnâts a chei Comuns e Provinciis che a presentaran il lôr progjet ae Agjenzie. Al è stât comunicât ancje che une cuote ulteriôr di finanziaments a saran doprâts a Triest. Il bant al è sul sît www.arlef.it.